

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 17 1940

40

T 3222/0 .83.2

福建續志卷九十

雜記一 祥異

太虛之表二曜列星布宣四氣積分漸餘散而罔紀則爲之置閏歲時乃成易象陰陽奇偶窮天地萬物之變象爻既定別作雜卦剝義以明向也舉大者不遺細取精者其用宏事物之理其致一也通志體衷正史而尤切於時俗故稽郡邑叙山川綜政化彙人材論次既畢則以雜記終焉豈好奇而愛曠哉流火祥彙飛星雨經訓書之與人之謠幃薄之近事列諸史傳子

福建續志卷九十

雜記一 祥異

太虛之表二曜列星布宣四氣積分漸餘散而罔紀則為之置閏歲時乃成易象陰陽奇偶窮天地萬物之變象爻既定別作雜卦剝義以明何也舉大者不遺細取精者其用宏事物之理其致一也通志體衷正史而尤切於時俗故稽郡邑叙山川綜政化彙人材論次既畢則以雜記終焉豈好奇而愛曠哉流火祥桑鷓飛星雨經訓書之輿人之謠幃薄之近事列諸史傳子

哈佛大學漢和圖書館珍藏印

雲博識爰採方言張說摛文聿脩廣記是皆莛
論之所不及特書之所未詳後世三復其書蓋
亦多聞之助而鑒戒之資也不然卮言誕詞君
子鄙之久矣續志雜記

福州府

乾隆二年八月十五日夜颶風海溢南臺江水漫大
橋

四年春屏南縣虎為虐至秋始息

八年彗星昏見西方

十二年古田縣大水

十五年八月初八日夜大風雨水淹貢院號舍
十六年七月閩縣候官長樂福清連江羅源俱大

風雨

十八年春三月閩縣候官長樂福清俱大疫

二十五年秋八月十五日樣樓灾

二十八年總督署產五采芝

二十九年夏四月閩清縣水漂田廬

興化府

乾隆四年夏四月隕霜

十二年夏六月二十三日僊遊縣綵雲見西方

十四年正月二十二日大風雨

十八年自春徂夏大疫

二十二年大旱饑

泉州府

乾隆七年自春徂夏不雨無禾

十三年惠安縣大風海水驟漲傷田稼

十七年同安縣大風

十八年大疫

二十二年大旱饑

二十三年大旱饑

二十五年同安縣大水壞田廬

漳州府

乾隆元年雨雹

七年正月不雨至四月

十四年春旱至秋七月乃雨

十七年三月二十九日雷震死數人七月大水漂

沒廬舍十二月平和匪類蔡榮祖謀襲郡城事洩

被獲與其黨四十二人俱斬於市

十九年五月大雨水淹田廬奉文賑恤九月海澄

潮湧傷稼

二十二年旱

二十三年旱渠港皆乾

二十六年正月海澄縣新路口災

延平府

乾隆八年十一月彗星昏見西方

十五年秋八月大水

二十九年夏四月大雨沙縣永安縣水淹田廬民畜漂沒無算

建寧府

乾隆四年夏四月浦城縣 文廟尊經閣燬於雷火

五年府城鼓樓災

八年閏四月浦城縣民家豕生豚一頭二身二尾八足

十三年春正月匪類魏現聚眾謀逆官兵討捕之六月伏誅

十五年大水

二十九年大水

邵武府

乾隆二年三月十八日有火大徑尺觸天自西而南墜下有聲轟然

八年夏四月大水六月建寧縣西鄉雨豆

十四年四月邵武光澤二縣大水壞城垣廬舍

十五年六月建寧縣大風晝晦有蛇從城北後山

隨雲飛去

十八年夏四月大水建寧縣 文廟有白雀數千

飛繞

汀州府

乾隆二年歸化縣雨雹大風

五年永定縣大水壞田廬

八年正月寧化縣大風飄居民屋瓦

九年正月清流縣災四月又災

十四年八月清流縣鐵石磯災燬巡檢司

十五年正月長汀等縣大水八月寧化縣大水

十六年夏五月寧化清流二縣大水秋七月颶作

拔木飄瓦

福寧府

乾隆二年八月十五日夜海水溢寧德縣大風雨是

歲歉

七年七月寧德縣大水

八年寧德縣大旱饑

九年十月初十日火燬鼓樓延龍波東西政平上下萬安五境越日乃息

十四年四月壽寧縣災焚民居百餘區

十五年七月寧德縣暴風雨溪水溢人多溺死八月初九夜大風雨東門城樓圯福安縣大水

十六年五月壽寧縣星墜有聲七月八日大風雨山崩水湧漂民居無算福安僊嶺山鳴連日雨溪漲漂沒廬舍是年饑

十七年饑匪民陳士樂倡劫富家粟論罪有差七月雷震死牛三十六隻

十八年三洋柘洋等處羣虎爲患二十一年始息

二十二年五月寧德縣南山鳴

二十四年府治產芝

二十五年三月二十八日災焚民舍百餘區

臺灣府

乾隆十二年臺灣鳳山二縣潮溢壞民田

十八年大旱

永春州

乾隆七年永春州德化縣三月不雨至五月乃雨

十三年正月朔文廟慶雲見

十八年四月大田縣大水淹仁美周田二鄉民畜
殆盡

龍巖州

乾隆七年旱

十七年龍巖大水

二十二年大雨水淹田廬

二十三年大旱

二十六年六月大水壞城垣

雜記一 叢談

福州府

魏景元元年吳主默亮為侯官侯遣之國注晉志曰

建安郡故秦閩中郡漢高祖以封閩越王及武帝

滅之徙其人名為東冶後漢改為侯官都尉吳置

建安郡以侯官為縣屬焉宋白曰漢武帝元鼎六

年立都尉居侯官以禦兩越所謂南北一侯也資治

通鑑

陳天康元年建初里人嚴光之子恭商於維揚舟次

市竈五十而舍之光家居一日有被黑衣五十人

送緡錢五千曰君之子恭揚州所附還也及恭回

驗之實未嘗有乃悟贖竈之事遂舍宅為寺閩中

王十八娘天寶間宮人與太真寵相亞馬嵬堆玉十
八娘亦歸晉安故里明萬歷間與閩人東海生冥
會歌菩薩蠻詞云妾身本是瑯琊種當年曾得君
左寵傾國鬪紅粧人稱十八娘絳綃籠玉質纖手
金盤擘驛路起塵埃驪山一騎來見幔亭集按東
坡永荔枝詞有骨生肌香恰是當年十八娘之句
或以爲十八娘卽荔枝也詞苑叢談

道山有薛老峰薛老薛逢也咸通中爲候官令與僧
靈觀遊創亭其側人書其峰曰薛老云按逢有元
日田家詩南村晴雪北村梅樹裡茅簷晚盡開蠻

榼出門兒婦去烏飛迎路女郎來想閩中詩也但

唐書本傳未見逢令候官爾閩書

林傑五歲與父同遊王僊君壇作詩曰羽客已登雲
路去丹砂草木盡凋殘不知千歲歸何日空使時
人掃舊壇年十歲方秋初忽有雙鶴盤空而下忻
然下堦抱得一隻父恐非常令放之鶴升而去是
夕得病而卒鄭立之以詩哭之曰才高未及賈生
年何事孤魂逐逝川螢聚帳中人已去鶴離臺上

月空圓

古今詩話

韓偓流寓閩中所作詩僅傳南臺懷古一首後卒於

閩其子寅亮與鄭文寶言僿捐館日溫陵帥聞其
家藏箱笥頗多而緘鏞甚固發觀得燒殘龍鳳燭
金縷紅巾百餘條蠟淚尚新巾香猶鬱乃僿爲學
士日視草金鑿夜還翰苑當時皆宮人秉燭以送
悉藏之又文寶少遊於延平見一老尼亦說斯事
尼乃僿之妾耳第未考僿葬於何所也筆精
周朴惠末詩人寓於閩中僧寺假丈室以居諸僧晨
粥卯食朴亦攜巾盂厠諸僧下畢飯而退率以爲
常郡中豪貴設供率施僧錢朴卽巡行拱手各丐
一錢有以三數錢與者朴只受其一得千錢以備

茶藥之費將盡復然僧亦未嘗厭也性喜吟詩尤
尚苦澁每遇景物搜竒抉思日旰忘返苟得一聯
一句則欣然自快嘗野逢一負薪者忽持之且厲
聲曰我得之矣樵夫瞿然驚駭掣臂棄薪而走遇
巡徼卒疑樵者爲偷兒執而訊之朴徐往告卒曰
適見負薪因得句耳卒乃釋之有一士人欲戲之
一日跨驢於路遇朴在旁士人乃欹帽掩頭吟朴
詩云禹力不到處河聲流向東朴聞之遽隨其後
士促驢而去行數里追及告之曰僕詩河聲流向
西何得言流向東士人領之而已全唐詩話

唐乾寧三年狀元沈崧閩縣人仕錢鏐父子拜相與
 羅隱契厚崧為文摹寫徐庾隱墓誌崧筆也駢麗
 詳正末作兩銘一誌兩銘此為僅見崧集不傳余
 所見者但此篇耳志云隱曾祖羅僊字童知仕福
 清縣令福州志失載精筆

閩王繼鵬元妃梁國夫人李氏同平章事敏之女繼
 鵬寵春燕欲廢夫人內宣徽使叅政事葉翹上書
 極諫繼鵬批其疏後曰春色曾看紫陌頭亂紅飛
 盡不禁秋人情自厭芳華歇一葉隨風落御溝放
 翹歸永泰梁國竟廢金鳳外傳

李倣怨陳金鳳負已謀所以奪之寵乃盛飾其妹春

燕進於延鈞春燕時年十五婉媚絕代因冊為賢

妃明年元夕延鈞召前翰林院承旨韓偓宏文館

直學士王偁右補闕崔道融吏部郎中夏侯淑等

觀燈宴樂命各賦大酺樂偓感長春宮失寵賦詩

曰淚滴珠難盡容殘玉易銷倘隨明月去莫道夢

魂遙延鈞為動念因返駕長春宮金鳳外傳

閩王延鈞度民二萬為僧由是閩中多僧綱鑑紀事本末

永福澄潭山去城六十里五代時陳嵩居此嵩嘗出

遊有辭父墓詩云高蓋山頭日影微野風吹動紙

錢飛墳前滴酒空
垂淚不見丁寧道
早歸萬首唐人絕句
又作陳去疾詩按明一統志載此詩於南安縣高蓋山下以爲歐陽詹作閱歐陽集不載乃知纂脩當有考也

閩書

蔡密學知福州日令諸邑道傍皆植松白大義渡夾道達於泉漳人稱頌之云夾道松夾道松問誰栽之我蔡公行人六月不知暑千古萬古搖清風

志

鄭俠少隨父官江寧讀書清涼寺閉戶苦學時王安石以舍人居憂聞而竒之使其徒楊驥往依俠學

雪寒俠讀書過夜半拉驥起登閣望雪酣賦浩然他日驥爲安石誦之安石歎賞其漏隨書卷盡春逐酒甌開之句

閩書

鄭公俠性清儉布衣糲食終其身州倅許景衡過公廬見其飲具皆白鐵旣去遺以銀器辭曰不鬻則質之非貧家所常蓄也然喜賓客誨誘學者孜孜不倦客至無貴賤輒留與飲率不過蔬菜一肉適飽而已且爲陳古今忠孝之道聖賢立身之本家雖不裕於財嗇用而廣施未嘗有靳吝之色

建康志

宣和元年一拂先生鄭俠忽夢有客稱鐵冠道人遺

之詩視之乃蘇子瞻也先生與子瞻同貶嶺外其詩云人間眞實人取次不離眞官爲憂君失家因好禮貧門闌多杞菊庭檻盡松筠我友迂疎者相從恨不頻寤而歎曰吾將逝矣作詩二首授其孫而卒時年七十九

侯鯨錄

西塘先生集九卷宋福清鄭介公俠著萬歷中其鄉人葉文忠公向高得秘閣本刻於金陵按先生集南渡後凡三刻今本乃第四刻也先生爲人所謂浩然之氣至大至剛其詩文亦如之大抵似石守道而無其怒張叫呶之習有德之言仁者之勇彷彿見之古詩如古交行呈子京等篇在樂天東野之問近體和荊公何處難忘酒一章令奸邪九原之下猶當慚汗先生子壻卽艾山林光朝也

居易錄

古靈先生陳述古書法在蔡君謨之右學柳誠慤酷肖也烏石山平遠臺鼓山卧龍俱有題名鐫之石壁皆徑五寸鮮有知其妙者

筆精

政和二年林瑗與衆砌永安門州產榕木河堤官廨多植之治平四年張郎中伯玉令通衢編戶濬溝六尺外植榕爲樾歲暮不凋熙寧以來綠陰滿城行者自不張蓋政和中黃尚書裳時補其缺今定

安宜興新河尚無恙東南數里僅存數株矣三山志

林槩福清人徙居吳門嘗為省試第一載國史儒學

傳其子曰希旦邵顏相繼登科希為樞密諡文節

旦為殿中侍御邵為顯謨閣直學士諡文肅顏為

光祿卿希之子虞中詞科旦之子處亦登第邵之

子攄賜出身為中書侍郎近世儒門之盛必推林

氏云中吳紀聞

徐遜博學尚氣崇寧二年為特奏名魁時已老矣赴

聞喜宴歸騎過平康同年所簪花多為羣娼丐取

惟遜花獨存因戲題一絕云白馬青衫老得官瓊

林宴罷酒腸寬平康過盡無人問留得宮花醒後

看宋碑類抄

熙寧間福州洪浩居太學累年其父以詩寄之浩得

詩感泣遂揖諸生歸聞而歸者十五六焉逮紹聖

間始著歸省之令然猶九年為限崇寧二年推行

三舍有司以學法進呈徽宗曰興學校以厚人倫

申孝弟而學生有祖父母父母不得省視立法有

九年之久考之人情頗為未妥因改為三年之限

上庠錄

狎峰蕭公國梁登科是歲第一人本丞相忠定趙公

故事設科以待草茅士凡預屬籍挂仕版者法當
遜避唱名日遂陞蕭爲榜首其謝啓云預飛龍之
選淮南論次以當先無汗馬之勞鄼侯何功而居
上蓋用宗室及蕭氏事人多稱之宋禪類抄
永福梁宗範字世則年十三時母攜之謁縣宰問所
能範拱手對曰某初學詩宰畫竹絹扇命題宗範
援筆立就云團團紈扇阿誰縹露出琅玕三兩莖
密葉旋從人意長纖枝全藉筆毛生翠筠不動風
常在勁節無根色自榮只恐半天雷雨夜化龍應
向手中成宰大竒之後登重和進士永陽清氣錄

永福邑東有獄宮乃吳太博經創建殿上梁日邑中

諸寓公咸在吳以書梁儷語首遂給事黃公龜年
公卽領畧立解手帖濡筆作字云風馬雲車儷百
順勾陳之衛金枝玉葉拱萬齡宸極之尊詞語鏗
潤筆法高古太博初見畧不經思復疑帛書非法
旣而雙美契始大喜心服曰吾邦山川之秀有如
此者游宦紀聞

尚南壽赴省試道出衢州境憇大木下見一男子方
投纒氣猶未絕爲解救移時而甦聞是開化弓手
尉逸一妾遣跡捕盜知爲他郡牙僧轉賣欲辦取

贖欠錢三萬家業窮空子姪皆充役若徒步歸報必遭譴怒寧以身就死不貽家禍也高惻然傾囊貲三十千與之遂行是歲中科調開化尉有竄盜劫巨室州督捕甚峻期以必得高大窘忽有拜於堦下自言某乃昔年蒙恩再生者今雖死念無以報德偶知寇所在故來告其人方醉卧郭門外神廟中宜即往擒之高即集部曲出門鬼導於前至一大廟羣盜祀神飲福醉寢遂悉縛之不遺一人高用賞格改京銜

夷堅志

胡澹庵乞斬秦檜貶盧溪王廷珪以詩送之寺丞陳

剛中亦以啓賀云 滕請和知廟堂禦侮之無策

張瞻論事喜樞廷經遠之有人身為四海之行名若泰山之重又云知無不言願請上方之劍不遇故去聊乘下澤之車亦貶安遠盧溪晚年孝宗召赴闕除直秘閣一子扶掖上殿壽踰九十寺丞竟死安遠無子其妻削髮為尼幸不幸之不同如此

鶴林玉露

趙忠定既以議者之言去國韓平原之權遂張公議譁然日有懸書北闕下者捕之莫知主名大學生教器之陶孫亦有詩其詞曰左手旋乾右轉坤羣

公相扇動流言狼胡無地歸姬旦魚腹終天痛屈
原一死固知公所欠孤忠賴有史長存九原若遇
韓忠獻休說渠家末代孫一時都下競傳既乃知
其出於器之平原聞之亦不之罪也器之後登進
士第今猶在選調中

程史 按書影云器之成是
詩墨未乾而壁已與去器之

恐易服逃去變姓名能肯誅始
成進士與此所載不同竝存之

鄭僑丰姿秀發邑尉見之喜約妻以女及中第日尉
已捐館其妻挈累扶櫬相遇於中途僑哭之慟命
逆旅主人達情請遂初約夫人辭以貧且謂黃甲
少年當結鼎族僑垂涕曰吾許人以諾死而負之

吾行將何歸遂定婚於邂逅間分攜慟哭而別某
氏從公歸能執婦道公登從橐夫人尚無恙若公
者可謂有德有言者也

遊宦
紀聞

黃公槐字仲美永福麟峰人乾道二年進士事母至
孝宦遊於外賦北堂之詩曰北堂思親也瞻彼北
堂在彼永陽白雲之下通化之鄉瞻彼北堂在彼
永水白雲之下新豐之里北堂有子其實三兮仲
焉此去其心慘兮詩刻於延平菴論者以爲南陔

白華之遺音也

榕海
詩話

掄魁省元同郡自昔以爲盛事紹熙庚戌省元錢易

直狀元余復紹定己酉省元陳松龍狀元黃璞皆
福州人一時士林歎羨以為希濶之事

齊東野語

潘昉廷堅以豪俠聞與莆人王邁實之不相下廷堅
初名公筠後以韶歲乞靈南臺神夢有持方牛首
與之遂易名為殿試第三人跌宕不羈傲侮一世
為福建帥司機宜文字日醉騎黃犢歌離騷於市
人以為僊其論巴陵一疏至今人能誦之以此終
身坎壈焉劉潛夫志其墓云公論其元氣兮入人
之肝脾有一時之榮辱兮有千載之是非昔在有
周兮觀孟津之師於扣馬之諫曰扶而去之彼八

白國之同兮不能止一士之異嗚呼此所謂世教

兮所謂民彝

齊東野語

陳魯福州人十五喪父廬於墓側有一黑鳥如鴛為

鷹所搏投其懷魯以衣蔽之得免分羹糝以畜之
養之一年毛羽成就乃以絳線結其羽縱之去既
十年其世父為山東尹坐誣謫戍因喪明魯往視
之歸行至僊霞嶺雪甚迷不知道腹又虛餒自分
今夕死矣須臾有一黑鳥起於前嗚呼盤蹙不已
魯祝之曰果我所養當直飛為導鳥立展翅若聽
許者引之行三十餘里夜向分始逢一舖噤不能

言以手擊門主人掖之人圍爐久之始能言問鄉
 邑曰福州曰福州有陳魯孝子子識之乎曰我即
 是也其主捧魯首哭曰兒也何以至此吾汝父之
 執某也因告以來故相與洒泣明旦視樹上黑鳥
 翅綵尚在共拜之因歎天之恤孝義殆不薄也

餘談

趙宋第十六飛龍元國降封瀛國公元君召公尚公
 主時有錫宴明光宮酒酣伸手扒金柱化為龍爪
 驚天容元君含笑語羣臣鳳雛寧與凡禽同侍臣
 獻謀將見除公主泣淚沾酥胸幸脫虎口走方外

易名合尊沙漠中是時明宗在沙漠締交合尊情

頗濃合尊之妻夜生子明宗隔帳聞笙鏞乞歸行
 宮養為嗣皇考崩時年甫童元君降詔移南海五
 年乃歸居九重憶昔祖宋受周禪仁義緯有三代
 風至今兒孫主沙漠吁嗟趙氏何其隆此詩舊錄
 於鄉人趙指揮問其所從來云得之上虞布衣素
 鉉未知何人作也後於至元真學正家見福建閩
 縣志書始知為閩人余應則所作若其事則備載
 錢塘瞿宗吉歸田詩話及袁忠徹臺符外藁然忠
 徹以此為虞伯生作則非也玩味詩中至兒孫主

沙漠之句似言元君避歸朔漠後事應則其國初
人歟記此以俟知者稗史類編

吳海知元將亡隱居不仕與潮州路總管王翰遊相
得甚驩兩人誓不事二姓海既屢召不起而翰亦
屏跡永福山中明太祖聞翰賢必欲致之令有司
敦逼就道海聞之卽白衣冠往弔未至舍得翰書
與訣曰昔在潮陽我欲死宗嗣如絲我無子彼時
我死作忠臣覆宗絕祀良可恥今年辟書新到門
丁男屋下三人存寸刃在手顧不惜一死了却君
親恩海語其使曰歸語而主吾來殯爾矣入門而

翰已自刎

東越文苑

洪武三年庚戌首開鄉試閩縣陳信長樂林文壽俱
元進士鄉闈再中則是元進士明初不入於進士
之列也莆田林泰元閩縣知縣復中建文己卯舉
人則是元縉紳明時與諸生等仍得入試也閩書
無錫浦舍人長源閩人林子羽老於詩學往訪之
子羽方與其鄉人鄭宜黃元輩結社長源謁之衆
請所作初誦數首皆未應至雲邊路繞巴山色樹
裏河流漢水聲驚歎曰吾家詩也遂邀入社因避
所居舍之日與唱酬

林枝字昌達閩縣人號古平山人有效顰集自十才子外能詩而不與其列者有趙迪景哲林紹淳裕鄭文霖汝衆林敏漢孟陳本叔固及枝也昌達集不傳徐興公家有老儒手錄明初詩今歸林鹿原子借觀錄之寄彭韞玉詩云空齋牢落事寥寥荏苒年光逝水消憶得當時分袂處柳花如雪過江

橋

靜志居詩話

狀元馬鐸少時夢中有語之者曰兩打無聲鼓子花不省所謂後與同郡林誌同舉進士誌高才鄉會皆第一殿試時忽夢馬踏其首以是快快爭於上

尚書不此中出耶公異其語召欲私之女正色曰何可草草公年高脫孕後誰明予者盍書數字爲據公命取側理女入公室以絳色機緞全端至公益竒之遂書舉男以機名女以緞名後舉男是爲大宗伯復舉女配侍郎鄭公絳緞至今尚存其家

勸小紀

王陽明先生至錢塘劉瑾遣人隨偵先生度不免乃託言投江以脫之因附商船遊舟山偶遇颶風大作一日夜至閩福州界比登岸奔山徑數十里夜扣一寺求宿僧故不納趨野廟倚香案卧蓋虎穴

也夜半虎遶廊大吼不敢入黎明僧意必斃於虎
將收其囊見先生方熟睡呼始醒驚曰公非常人
也不然得無恙乎邀至寺寺有異人常識於鐵柱
宮約二十年相見海上至是出詩有二十年前會
見公今來消息我先聞之句因爲筮得明夷卦遂
決策返虎

蒼

武宗時僉憲林文纘赴京舟抵潞河適武宗巡幸至
突入舫文纘俯伏船頭上鞭指之曰汝何從知隨
入舟時一婢抱纘六歲兒立艙中上問曰此何人
纘奏曰臣子上抱置膝曰相好當與朕爲子又指

婢曰仍命此女抱攜之時護蹕人至蹉踉促去兒
入宮思父母日夜啼百計誘之終弗止文纘亦入
都與素識大璫謀欲出兒璫乘機奏曰此兒誠薄
福啼旣弗止不如舍之且收留乞養祖宗有禁上
曰林某浼汝作說客耶如再啼當棄之水璫懼亟
與文纘謀覓善泅者伏河側兒啼不止上果棄之
河中泅者故扯兒入水中俟上回急出之兒僵矣
久之始甦文纘補官嶺南亟攜兒去不久又休致
歸杜門課子二十一歲舉於鄉又四年成進士名
璧世宗出武宗朝宮人前婢亦在列婢無歸問閩

紳姓名人引婢至福州會館詢乃得婢至館問有
 林紳否時璧適在寓道其詳遂與婢抱首哭攜歸
 鄉文纘從其志奉佛茹素終其天年文纘至九十
 五歲無疾而歿璧性伉直與時不合屢官屢蹶文
 纘與分宜為同年璧體父志終不附分宜官亦止
 僉憲居無一椽家於祠堂小童供炊爨亦世所僅

見者

閩小紀

鄭郎中善夫初不識王儀封廷相作漫興十首中有
 云海內談詩王子衡春風坐遍魯諸生後鄭卒王
 始知之為位而哭千里致奠為經紀其喪仍刻其

遺文文人之愛名也如此藝苑卮言

馬恭敏森之父年四十誕子甫四歲眉目如畫寶若
 拱璧偶婢抱出門失手跌傷左額死公呼婢奔避
 自抱死兒入口曰吾自誤跌死婦驚痛撞公倒者數
 四索婢撻之無有婢歸母家言其故感泣籲天願
 公早生貴子次年果生恭敏左額宛然赤痕昨非庵

纂

馬公森精算術天下糧餉解部至千萬以至毫忽但
 於掌上輪指算之無或遺失里中故事凡九卿官
 林下乘明轎出入公獨蔽幃幄以父母之邦不可

行辟人也姑某老而寡每三日一謁見及出必趨不敢於姑之門登輿秀才時猶姓裴後復原姓有祖孀郊居當公既貴仍呼裴五秀才元旦坐受公拜立茶而別以爲常萬歷癸酉公老矣時鄉舉門人某在棘闈閱卷欲物色公諸子公力卻自矢諸天曰江西總兵朱嘉謨都司賈勇向皆漕卒也因公薦拔至尊顯至公歸二人於三山驛私致餽金且曰謝所家居不足爲清德之累公峻拒二人泣拜而去

桂上
老舌

鄭少谷善落

峰北從之遊者九人鄉黨目爲十才子

少谷詩所云一時賢士俱傾蓋滿地萍踪笑舉杯是也九人者高二十二宗呂居首傅二木虛次之餘有林九王七施二其名不得而詳矣宗呂家最貧少公稱其事母至孝事兄至悌又稱其甘貧守節安安然人無知者蓋高傳爲鄭門弟子之冠少谷於傳盛誇其文於高則美其行云詩話明林雙溪錦多權術當分憲粵西時黎酋不靖錦取所斬賊首於讞囚日命烹熟進案上快噉之賊聞破膽其實所噉者乃麪爲之非人首也及謝政歸夜宿一驛有強寇數百人將爲亂錦知之僕御僅

詩話

二三十人不敵乃燎燭端坐洞開重門取點軍舊籍命從人戎裝聽點迴環不絕寇偵聞喧聲竟夜不知虛實遂不敢發

連江縣志

巨璫高宋至閩屢破鹽商之家後因怒一諸生之父廷朴之合學諸生大譟擊之幾不免火其所建望京亭宋伏署中不敢喘林世卿極力救之且以軟語啗諸生乃散而宋虐焰遂大減攻宋者王武部宇為首宋廉知之必欲得而甘心焉當事者莫之應王迺入北學避之遂登高第

福唐郭造卿建初所為燕史無所不囊括卷帙甚多

縮其半以為永平志而世猶不能盡傳也又縮而為盧龍塞畧二十卷蓋僅存什一於千百耳而於塞上故實山川阨塞甲兵錢穀情形諸戰守具靡不臚列一開卷而塞事瞭如指掌非但有裨掌故抑亦籌邊者所宜知也

蒼霞草

郭建初居盧龍三年而成燕史甚博甚辯又甚核甚麗且以瀋墨餘汁洒為碣石叢談十卷皆孤竹國

奇佚事也

韓求仲集

萬歷己丑謝在杭與徐惟和下第過杭州六和塔愛其幽靜各賦一首欲題壁間而寺僧號呼奈何浪

元通系志 卷之二
三
疥吾壁吾且取水滌之在杭笑不復題越三載在
杭拜吳興司理行部至杭詢之則寺僧懼罪逸去
久矣在杭大笑因復題云雙旌五馬遶江城驚起
山僧合掌迎三載重來渾似夢終軍原是棄繻生

閩小紀

候官陳鴻字叔度家貧無人物色之能始石倉園在
洪塘中有森閣集諸同人爲詩叔度有一山在水
次終日有泉聲句能始歎賞爲之延譽因卽以石
倉爲居停名其詩曰秋室篇取李長吉秋室之中
無俗聲也丙戌之變能始殉節叔度年七十二不

能自存以貧病死無子不能葬戊子予入閩時客
以其詩來予悲其蒿露謂客曰予任其葬子任其
詩因助以金浼諸生徐存永董其事先是莆田布
衣趙十五名璧亦工詩善作畫然性孤僻不多爲
人作惟山房寺壁則淋漓潑墨與叔度先後死亦
不能葬存永因舉十五之棺與叔度合葬於小西
湖之側予爲書碑曰明詩人陳叔度趙十五合墓
客刻叔度集予爲之序

因樹屋書影

閩林初文孝廉古度之父也嘗有送人詩云不待東
風不待潮渡江十里九停橈不知今夜秦淮水送

到揚州第幾橋以示梅禹金禹金激賞之宣城有老儒邱華林嘗以詩質禹金但為分句讀而已見之大恚曰林詩二十八字正得二十八圈吾詩字數倍之乃不得一圈耶聞者笑之漁洋詩話鄭邦祥著述甚富今其家所藏玉蟬庵散編不過千百中之什一也先生早歲即以詩名見推娶於謝妻兄在杭先生早貴顯反馬之日在杭預使傳言曰吾輩文人不可學世俗新親窠臼請聯名句以光嘉禮於是豆登先行觴酌既設一人呼韻則一人操筆墨就主賓前伸紙請書循環迭進不踰晷

刻是日所成至八十韻執事者奔走頗以為煩而主賓之意常若有餘滿堂觀者傳為盛事於是先生遂與在杭謝公能始曹公惟和興公二徐公主持斯文為騷壇弁冕口誅筆擊與世之號為眉目者不能無齟齬謝曹既早達二徐又早謝諸生獨先生尚淹沉龔序竟陵督學閩南昌言於眾曰吾往南中他無可喜者惟必將鄭孟磨抑置劣等且痛扶之亦足以豪矣語流聞至閩先生念弟子員自不宜與學使者抗在杭時方伯粵西遂往依之天啓癸亥除日韶陽溪上忽得句云五千歸路纔

過半四十行年尚待三語亦無大沉痛而不知其
 為讖也先生早年著述為曹能始採入十二代詩
 選兵燹後此書罕覯即所譁為盛事若八十二韻
 者亦久矣聲希響絕傳其軼事如左一警一欵正
 可於冠裳劍佩外求之耳劍面續稿

常熟時敏知海寧縣事夜草爰書有女子侍側磨墨
 問從何來曰鬼也敏既擢給事中代之者候官林
 塗鬼自是不復至林令忠臣以此知邪不勝正理

有然者

明詩綜

歐琪字全甫候官諸生少英偉嘗自署天下奇童歐

某同學使投試學使奇之試以七藝立就補弟子

員為人慷慨激昂工詩飲酒嘗擊劍彈棋以自肆

及丙戌與齊巽江不空同事乃變姓名入東粵削

髮為僧齊巽字又五候官諸生江不空候官人能

醫曾為僧與巽同殉難又同時張留字桐臣候官

儒士能詩終身不應試項元字白仙福清諸生棄

衣巾隱居不出黃士舉字天玉連江舉人性孤介

僧服為方外遊自號龜峰逋民有軸園詩集林春

秀字子實古田諸生能詩高隱毛元吉字仁仲閩

清諸生明亡棄去自肆於詩文皆全節終隱不出

徐英字振列里人呼之曰徐五以擔穀上常豐倉餉
口日晡則洗足散髮讀書賦詩自署其門曰問如
何過日但卽此是天曹能始徒步訪之邀至石倉
園竝攜其雜稿以行爲梓其詩於十二代詩選中
明亡能始殉節英伏尸哀哭自嚼其舌噴血數升
越三日亦死

榕海詩話

羅源縣百丈龍潭明景泰三年七月邑人禱雨投疏
文於潭頃之片紙浮出乃元至正間禱雨疏也衆
取其文誦之大雨如注又 國朝康熙十四年大
旱時耿逆叛寧德鄉民禱雨疏末末寫康熙年月

越三日無驗忽潭中浮出從前禱雨舊疏墳康熙
年號者道士乃易疏墳康熙十四年月日投入須

臾大雨如注

羅源縣志

閩中鬼孝子某事母以孝稱未幾孝子歿母無所倚
謀別嫁是夕孝子在空室嗚嗚然環榻而泣止其
母母大驚以無食告孝子曰兒尚能力養吾母也
母曰兒鬼也烏能爲養孝子曰母試於市上語擔
貨者云爾欲倍平日所擔吾兒能佐之母如其言
擔者難之其母強而後可擔者果增以倍孝子陰
佐之擔疾走如平時因以所獲錢歸半於其母如

是者數十年母得終老焉此候官高雲客語柴陞
升者曠園雜志

宮諭幾庭鄭公開極年十九成進士與張京江玉書
葉華亭映榴俱以少年選入內宏文院後夏龍
逢之難華亭殉節京江秉軸於朝公薄遊江左
值京江歸省墓一見歡甚曰朝廷方嚮用舊臣
吾旦暮還朝公當與偕行公曰吾以素心人久
契濶蘄一晤耳踈野之質不足供驅策自分已審
奈何不見信於故人耶笑飲盡懽而別歸杜門謝
賓客嘗書座右云操存主靜言動戒躁時年已耄

耄矣林青圃集

錢塘吳中林廷華以中書舍人通守興化數年罷去

僑居蕭寺穿穴賈孔著三禮疑義數十卷其集有

龍山歐冶金鼈見山南臺皆在閩時作也清流船

十首云五篙何處賦招招一片雲帆近大橋生怕

橫山溪水急開船趁得午時潮橫山橋溪水東下船必乘潮而西乃

得篷如半月壓船舳只許侏儒自在眠桅脚開窓

方尺五居然小有洞中天荒村破曉一鷄鳴朝日

山頭漸次明不似惜花春起早擁衾徐聽戛鍋聲

天明戛者戛起不為和羹佐傅巖何曾忘味有蘇髯

上游玉粒成餉換水口關頭爭食鹽上游鹽價甚昂舟人多私

載覓利水口設關巡如戟如刀千萬峰羊腸鳥道

查許貯食鹽五十餉水溶溶鐵梢公自誇能事不怕峻嶒石有鋒花猪

肥肉玉如肪還買河魚一尺強菡萏灘高明日過

晚來先向九龍王舟人專事九龍神鐵脚層冰未覺

寒百錢水袴費艱難赤身不怕陽侯怪笑踏波濤

過淺灘水袴長不滿尺入水穿之村醪無過壓茅柴秫米朝蒸

晚飯開一飯便浮三大白舖糟不待漉巾來樵蘇

水畔一舟橫留得青山客不爭柯斧滿林誰是主

白雲深處聽丁丁上水艱難千里多柴枝粒米易

消磨今朝到岸都歡喜小武當山一笑過城山在清

榕陰詩話

福清郭藥村人麟多論著尤精於禮嘗謂黃直卿以

朱子遺言續修喪祭二禮而其門人楊氏復言喪

服圖式祭禮遺稿尚有未及訂定有待於後之繼

志者又朱所編家鄉邦國王朝禮會屬勉齋更定

勉齋欲任斯責而卒未果今所傳儀禮經傳通解

全書匪直朱子不及見即勉齋亦未及見也中間

錯訛雜亂良多因撰讀禮私編十四卷四禮圖說

十二卷校定家禮圖註二卷陳汝楫撰傳

林子羽妻朱氏長於詩詞其勉外詩云玉食叨陪近
 上方五雲深處列鶴行經綸樹績從人仰竹帛流
 芳與世長待漏衣沾僊掌露趨朝身惹御爐香功
 成身退歸田日一榻清風綠野堂朱氏年十九卒
 子羽終身不娶按鴻為員外郎年近四十此詩既
 為郎時作而朱氏方十九豈其繼室耶閩小紀
 林姪字美君福清人姓王氏字林初文初文讀書鼓
 山每有寄將必佐以詩初文舉於鄉攜上春官下
 第遂居金陵初文十年不歸值歲凶美君以女紅
 為活教其二子君遷古度備嘗荼苦無怨尤詩作

即焚其稿存者其百一也女玉衡適倪延相亦能
 詩

鄧氏女閩縣竹與人萬歷中嫁瓊河鄒氏夫不類女
 鬱鬱不自得發為詩詞語多悽怨居二年竟以怨
 死臨終以遺草付其甥人爭傳錄有句云啼鳥落花
 春已暮孤燈殘漏夜偏長又垂簾阻歸燕開戶
 入飛花皆可詠也

閩進士潘仲微室人寄夫詩暮雨沉沉不肯休知君
 今夜宿誰樓遙知楚水吳山外旅况閨情一樣愁
 足以伯仲水國蒹葭之什趙仁甫有二女皆能詩

而才情不甚合作小草齋

周玉簫武人方輿妾輿建議撫紅夷忤大帥意繫獄
七年遣玉簫玉簫不去輿事解憤時事詣闕上書
遇國變又數年不得歸玉簫感慕病歿有詩三十
篇授其女蕙蕙刻而傳之玉簫好談古今節義事
常采古烈女懿可法佚可戒者皆作詩一篇比於
彤管其於名姬才女瑕疵嗤黠者往往嚴酷擊排
比於狗彘詩雖不文君子旌其志焉虞姬詩有序
良人有詩云彭城不似烏江敗尚有虞兮不屬人
刺呂雉也萇宏之血化碧貞婦之軀化石姬之節

烈豈宣化草詩人每以虞美人草詠姬子為正之
先勿謝重瞳差強隆準公應為松與栢豈化草芄
芄楊太后詩有序宋寧宗后有宮詞五十首國亡
從北狩年已七十矣時有能言鳥秦吉了遇北客
買之鳥云我南鳥不願北去遂以頭觸籠墜地溺
死老媪之舌亦巧心亦慧視之有愧多矣詞采三
朝母齡遐七十周何如秦吉了生死在南州
黃氏曇生固安令鄭蕉溪妻蕉溪官固安招戚友滯
畿下者至署度歲拈韻賦詩曇生亦與羣從子壻
通家子唱和除日剪絹成梅花作詩諸子競次其

韻喜謂蕉溪曰邇年落拓一官獨此耳著作甚富
秘不示人女孫翰尊櫝而藏之九畹古文

候官林瑛珮字懸黎杭州推官林雲錦女適拔貢生

鄭郊聰慧能詩有詩鈔懸黎遺稿嘗有秋夜寄夫

詩云獨立秋風前細訴秋風知一片別離情盡倩

秋風吹吹與三山客孤窓夢醒時又有千里夢隨

閩嶠落數行淚趁浙潮生之句人競誦之香草齋詩話

端溪璞玉夜珠色探向驪龍領下得吳趨孀女女媧

手煉石如泥工剪刻蚌形琢出月初圓秋水澄江

練一幅案傍亦有玉蟾蜍對此垂涎敢吞蝕鏤肝

刻腎玉川子箋奏天公枉費墨何如研露寫烏絲

翠袖佳人勤拂拭壬寅九月九日雪邨居士題余

與雪邨同館閣者三年內子廖則來齋舅氏女也

詩翰繪事色色精工魏國仲姬未多讓也雍正丙

午臘月大雪予過訪雪邨圍爐擁酒掃梅花大幅

雪邨發軔表姊氏圈花筆墨清潤極閨房之韻事

詩所云滴露烏絲翠袖拂拭予皆目覩其事茲歲

薄宦京師故人長謝回首曩年文酒縱談月斜燈

地時有如隔世已未九月二日與涪雲五弟夜坐

守餅齋談都門舊事展冊題記古梅謝道承史

閩清諸生孫允大女名琦幼知書婉嫵柔順嘗晨粧
 虎從牖突入距几下家人驚駭謂女必死矣使兩
 健婢覘之無恙亟翼以出詢之曰閃忽中不知其
 為虎故亦無大怖也長適永福諸生黃起鳳能執
 婦事君姑許性嚴肅氏能婉轉承順得其歡心姑
 疾以身代枕時其展側嘗一夜侍姑漏盡三鼓氏
 輦蹙憊甚不敢呻吟姑察其異問之則將免身矣
 姑曰婦甚孝其子必賢亟遣婦產室生子即惠也
 產方三日姑卒氏哀痛成疾瀕於危者數矣終身
 未嘗有疾言遽色家貧甚凝塵滿甕晏如也冬夜

漬麻水中水冰火熱之以績或勸其少休氏曰吾
 夜不績則兒旦何哺耶惠從余遊每為余言其母

必六不止云洪良堂集

張季琬字宛玉新安河廳洪女適江寧叅軍朱文炳
 能詩工繪事白題蛺蝶圖云濛濛飛出宋東家春
 去何心夢落花描得滕王新粉本小窻只當寫南

華福州府志

莘田二女長曰淑窈次曰淑晚皆擅詩名淑晚有題
 杏花雙燕圖云艷陽天氣試輕衫媚紫嬌紅正鬪
 酣記得春明池館靜落花風裡話呢喃夕陽亭院

曲欄東燕語時飛扇底風不管春來與春去雙雙
長在杏花中時人皆稱之榕陰詩話

吾閩閨秀多能詩近更有結社聯吟者若廖氏淑等

鄭氏徽柔莊氏九畹鄭氏翰尊許氏德瑗及余女

淑窈淑畹皆戚屬復衡字相毗每讌集各拈韻刻

燭或遣小婢送詩筒無不立酬者女士之壇坫亦

一時韻事也廖為余中表許考功雪邨婦字壽竹

兼工繒事鄭為明府石幢太守荔鄉姊余之表姊

字靜軒少寡今年九十九畹字蘭齋余妻族女許

字廣文吳景翊子未嫁而守貞翰尊字秋羹石幢

女山陰明府林培根妻德瑗字素心州牧石泉女

適何氏亦少寡無子與莊皆以節著余女淑窈字

如洲適游壻諸生藝淑畹字紉佩適林壻春起

軒隨筆

乾隆壬午子年八十復膺重宴鹿鳴 盛典諸戚友

及四方郵寄各贈言金薤琳瑯盈箱積帙子愧不

敢當而閨秀諸什亦有可傳者手執異人斫桂之

玉斧足蹈大海駕柱之鼈頭路旁觀者互嘖嘖是

何慘綠年少真風流中年作宰不稱意牛刀小試

高人羞拂衣歸里且却掃溪山詩酒此外復何求

以茲葆光養性享大壽鬢眉如雪明雙眸 朝廷
有詔待國老大袍都紵杖則鳩與新郎君旅進退
重聽鹿鳴之呦呦鄭靜軒句也中年領綬出綬江
三載賢勞書上績惟翁不喜爲折腰高懷遠媿陶
彭澤一官棄擲輕鴻毛翠羽明璫咸擯斥宦橐蕭
蕭淡若秋歸舟維載端溪石歸來縱飲發高歌如
鶴一聲松千尺盤中甲子相轉環六十金霜似駒
隙回首蟾宮記舊遊秋風兩度重來客許雪邨內
子廖恭人句也漢殿歲星人共識不須更訊大王
○歌罷鹿鳴更天保九如齊唱兩三章鄭石幢女

翰尊句也尊酒瓶花秋氣象雲階月地舊因緣鄭
荔鄉女咏謝句也錦袍染酒臨風醉白髮簪花帶
露鮮荔鄉女鏡蓉句也人間一第比登天不道先
先又况是文章領袖荔鄉女雲蔭燭影搖紅詞也
北海文章推巨手東山絲竹寄遙情荔鄉女金鑾
句也早書淡墨魁時彥老把金丹度後人吳景翊
子婦莊九畹句也文章退之筆詩句玉溪篇蓋榜
重開口蟾宮再到年許石泉女德瑗句也接席簪
裾多後輩稱觴兒女半華顛姓名千佛標金簡
恩禮三朝錫耄年余女淑窈句也老父登科日慈

親未嫁年至今椿樹茂憶母一潛然受錄泥金簡
 加餐種玉田觀香諸姊妹聯咏大羅天余次女淑
 畹句也喬松標格鶴精神白髮簪花作瑞人六十
 年來典型在新嘉賓拜舊嘉賓余外孫女游合珍
 句也廖恭人復為余寫歲寒圖亦蒼勁有致

香草齋詩

福建續志卷九十終

福建續志卷九十一

雜記三 叢談

興化府

主延彬刺泉州徐寅每同遊賞及陳郊倪曙等賦詩
 酣酒為樂凡十餘年常被病求藥物於延彬延彬
 答書善自調護亦可自開豁三皇五帝不死何歸
 蓋舉寅人生幾何賦語以戲之也寅賦膾炙人口
 渤海高元固來言本國得斬蛇劍賦御水溝及人
 生幾何語家家皆以金書列為屏障其珍重如此

十國春秋

朝奉郎李邁知興化軍時蔡君謨襄自福帥罷歸病
革以後事屬李守夜夢神人紫綬金章從數百
鬼物升廳云迺八者守問何神代者復何人神曰
余閻羅王蔡襄泊代我明日蔡公薨李作挽詞有
不向人間為家羊却歸地下作閻王之句蓋實錄
也泊宅

方子容知惠州適東坡謫此雅相厚善東坡築白鶴
新居子容割俸以助其役後東坡再謫儻耳子容
曰此固前定可無恨吾妻沈素事僧伽謹甚一夕
夢和尚告別沈問所往答曰當與子瞻同行後七

十二日當有令今適七十二日豈非前定耶前田縣志

黃琮宰泰寧內臣楊安時為廉訪使者數干以私皆
拒不答嘗切齒思報會奏事京師徽宗問閩屬令
賢否安出不言錯愕失對惟憶琮一人姓名極口
稱贊上即日召赴都堂賜章服改員外郎莆陽比事

蔡元長既南遷中路有旨取所寵姬慕容邢武者三
人以金人指名索也元長作詩以別云為愛桃
花三樹紅年年歲歲悲東風如今去逐他人手誰
復曾前念老翁何元長之竄也道中市飲食之類
問知蔡氏皆不肯售至於詬罵無所不道州縣吏

爲驅逐之稍息元長轎中獨歎曰京失人心一至於此至潭州作詞曰八十一年住世四千里外無家如今流落向天涯夢到瑤池闕下玉殿五回命相形庭幾度官麻只因貪戀此榮華便有如今事也後數日卒門人呂川卞老醵錢葬之爲作墓志乃曰天寶之末姚宋何罪云揮塵後錄蔡卞妻王安石女頗知書能詩詞蔡有國事先謀之於私第然後宣之於廟堂時執政相語曰吾輩每日奉行者皆世咳唾之餘也蔡拜右相家宴張樂伶人揚言曰一丞今日大拜都是夫人褰帶譏其

官職自妻而致中外傳以爲笑

清波雜志

蔡卞玉人也然其作毛詩雜解頗有可取者如木瓜詩云齊桓信義及於諸侯率懷其德不專畏其力故問遺得以稱其重輕以爲禮孔子所以歎曰吾於木瓜見苞苴之禮行焉香祖筆記

蔡條京之子撰西清詩話宣和五年或言條論議專以蘇軾黃庭堅爲本奉旨特落職勒停后山居士集有與魯直詩云正夫有幼子明誠頗好文義每遇蘇黃半簡數字必錄藏以此失好於父正夫挺之字也蔡趙輩勢能禁天下不敢習蘇黃詩文而

不能得之於其子異哉

池北偶談

采香陳紫所從出核有斧痕予驗之實然樹在宋氏宗祠後至正戊戌六月宋介夫遺百顆與盧希韓並搗蔡公詩墨一紙有多情故舊偏憐我一種甘香更可人宋祖芳名傳不滅蔡公妙跡玩猶新之句亦刻於石永樂以後樹漸枯死今其世孫宋比玉烏山屋傍尚有一樹大數十圍腹已空可坐四五人相傳是其孫枝云

開遊志

洪武三年行徵辟之典時法令嚴峻士有逃官不赴者莆邑黃孟良詭不識字辭聘仇家出其九鯉湖

詩告於郡逮繫至京太祖覽其詩大加擊節即除

授松陽知縣

莆田縣志

岳季方正以閣臣出為興化太守城中有水自西來堰而滙之立石為記題小西湖三字遒勁有韻媚曹石者因騰謗書彭惠安韶郡人也力明無他僅得致仕公薨几上一紙飛下有一絕句云年來為戀小西湖塵世飄飄一幻軀目下雲生扶杖杖天邊露滴掛冰壺宛然手筆其子亟入公舊書室見硯有墨汁筆潤如新

湧幢小品

唐林蘊就試試合浦還珠賦思之未得忽假寐有人

告之曰何不云珠去勿珠還也覺而異之即用其
語遂登第後見素林公俊有族父康為廉州二守
見素以詩寄之曰破荒詞賦落人間水異川精兩
媿顏今日雲初居此地祇令珠去勿珠還蓋用前
事云閩小紀

嘉靖初林見素再起為刑部尚書適文徵仲應貢至
京乃游揚於公卿間得授翰林待詔見素曰吾此
行為文徵仲了此一事不為徒行矣明世說新語
方布政守致仕家居貧甚嘗以事入郡城使其季子
偕一僕肩輿赴宴酒數行即歸蓋夜寒甚難其子

之久伺也此與陶靖節使門人同二兒昇簋輿同
而方歷官方伯清苦至是尤近世士大夫所難拙庵

管見

翠渠周公瑛知廣德日有巫能使童子舞公摘樹葉
置童子懷中戒之曰汝第舞但樹葉落則答汝於
是巫百計作法童子終不動蓋童子心以守葉為
主也以是見人心有主則不動仰山勝錄

亡友莆田林嘉璣字衡者述其從祖文簡公善書法
魏忠賢敦請不與忠賢矯詔命公題扁公大書畏
天命三字題曰禮部尚書某奉旨書時忠賢出餅

啗公云出手製公以南人不慣食麪飭忠賢方術
 之公遽請歸里陞見德陵謂公曰長尙書乃欲歸
 耶賜之鱗玉以公儀表頎而長也又言公五言律
 原出右丞誦谿堂集信衡者不我誑也靜志居詩話
 莆邑文物極盛自唐林披生九子為刺史外又有黃
 璞與子仁藻仁渥仁渭一門五學士宋熙寧
 丙辰徐鐸舉狀元薛奕應武舉亦狀元故神宗詩
 云一方文武魁天下四海英雄入彀中紹興戊午
 黃公度狀元陳俊卿榜眼故當時有句云粉榆未
 五里魁亞占雙標明時有一科兩解元者永樂戊

子福建楊慈應天黃壽生宣德壬子福建林同順
 天宋雍有一科五魁者嘉靖癸卯第一黃繼周第
 三林仰成第四黃謙第五江從春而林豪以訓導
 中廣西第二適符五魁之數又景泰癸酉科中式
 四十四名占全閩解額之半明代九十科莆田發
 解者三十人占全閩三分之一左邑中盛事也莆田

縣志

陳白雲先生昂寓金陵姚太守客之給居食久之姚
 死無所依賣卜秦淮或自榜片紙於扉為人傭作
 詩文時林古度與其兄林亦閩人寓居金陵一日

過其門見一扉之內席牀缶竈敗紙退筆錯處其中檢其詩誦之每稱其一詩輒反面向壁流涕嗚咽至於失聲其後每過其門輒袖餅餌食之輒喜復出其詩泣如前居數年竟窮以死其子倉皇出負棺衣舁之中野古度兄弟急走索其集無所得得手書五言今體一帙其自序畧云昂壯夫時尤嗜五言第家貧無多古書得王右丞卽誦讀右丞得杜工部卽誦讀工部間取其所中規中矩者時或一周旋之又時或一折旋之含筆腐毫研精殫思今觀其五言律七百首則先生所學所得盡此

數言矣其云末一卷爲排律亦不存謝兆申云有集十六卷在江浦族人家吾友張慎言曰白今入市門見賣菜傭皆宜物色之恐有如白雲先生其人者甚矣有激乎其言之也

莆田尤宗謙有青衣范生能彈琴吹簫亦學爲詩王弇州調之詩云瑤琴罷鼓紫簫來手草新詩阿濫堆除却數行僮約外還應事事勝方回

筆精

宋宮人斜在南山月峰右舊爲雨場國朝康熙間有樵豎入其穴竊蟾蜍釵鏡以歸宮人憑巫自述爲宋殞隨官家航海歿此樵懼反寶器而掩之林

麟焟有宮人斜詩王阮亭謂其詩入唐人鼓吹集
竟不可辨

莆田縣志

泉州府

泉山通志引顏師古漢書註指此為越王所保之泉
山非是漢書朱買臣傳云發兵浮海直抵泉山師
古註云泉山即今泉州之山自師古時言乃唐貞
觀初之泉州今福州也又謂北山之巔乃東甌王
避漢兵之處然東甌王即東越王餘善為漢兵所
攻自所保之泉山南徙大澤中繇王居服殺以降
漢亦無由至此山也

隆慶府志

唐開元中漳泉二州分疆界不均互訟於臺制使不
能斷數年辭理紛亂終莫之決於是州官焚香告
於天地山川以祈神應俄雷雨大至霹靂一聲崖
壁中裂所競之地拓為一逕高千尺深五里因為
古道中有古篆六行二十四字皆廣數尺雖約此
為界人終莫識貞元初流人李恊辨之曰漳泉二
州分地太平永安龍溪山高氣清千年不惑萬古
作程所云永安龍溪者兩郡首鄉名也

太平廣記

唐書歐陽詹傳曰詹舉進士與韓愈李觀李絳崔羣
王涯馮宿庾承宣聯第皆天下選時稱龍虎榜故

劉昌言詩曰一舉首登龍虎榜十年身到鳳凰池
世以為榮

漁隱叢語

閩川歐陽澥者四門詹之孫也澥娶婦經旬辭赴舉
久不還家詩云黃菊離家十四年又云離家已是
夢松年又云落日望鄉處何人知客情自憐十八
年之帝鄉未遇知己也亦為燕詩以獻主司其詞
雖為朝貴稱羨尙未第焉其詩曰翩翩雙燕畫堂
開送古迎今幾萬回長向春秋社前後為誰歸去
為誰來

唐詩紀事

俗傳羅隱出語成讖著有異跡若羅裳山之畫馬石

深滬之石壁山書字及建安書筒灘所載予初尙
未信其果羅隱與否及讀楊文敏傳書筒灘記已
稍信之因閱黃滔贈隱詩三徵不起時賢議九轉
終成道者言方知隱學道修真人也

閩書

顏仁郁泉州人仕閩為歸德場長時曰荒民散仁郁
撫之一年襁負至二年田萊闢闕三歲而民用足
有詩百篇宛轉回曲歷道人情邑人途歌巷唱之
號顏長官詩其勸農詩曰夜半呼兒趁曉耕羸牛
無力漸艱行時人不識農家苦將謂田中穀自生

十國

春秋

泉州魯司寇廟庭有皂莢州人舉進士觀其莢多寡以爲應梁貞明中忽生一莢有半莫測其祥是歲陳逖進士及第半莢之枝遂成全莢稽神錄

王延彬邇之子忠懿之猶子也邇死襲其父封於泉性多藝而奢縱日服一巾櫛日易一汗衫能爲詩亦好談佛理詞人禪客謁見多爲所沮初邇領兵至泉州舍於開元寺始生延彬於寺之堂旣生而有白雀一棲於堂中迄延彬之終方失其所在凡三十年仍歲豐稔每發蠻舶無失墜者人因謂之招寶侍郎朝廷贈延彬雲中節度使及卒復葬雲

臺山迄今閩人謂之雲臺侍中有詩曰兩衙前後訟堂清軟錦披袍擁鼻行雨後綠苔侵履迹春深江杏鎖鶯聲因攜久醞松醪酒自煮新抽竹筍羹也解爲詩也爲政儂家何似謝宣城人多誦之稗史彙編

劉昌言泉州人極有才思嘗下第作詩落句云唯有夜來蝴蝶夢翩翩飛入刺桐花後爲商州記室王禹偁贈詩曰年來復有事堪嗟載筆商州鬢欲華酒好未陪紅杏宴詩狂多憶刺桐花蓋爲是也刺桐花深紅每一枝數十蓓蕾而葉頗大類桐故謂之刺桐唯閩中有之青箱雜記

黃夷簡閒雅有詩名在錢忠懿王俶幕中陪樽俎二
十年開寶初太祖賜俶開吳鎮越崇文耀武功臣
遣夷簡謝於朝將歸上謂夷簡曰歸語元帥朕已
於薰風門外建離宮規模華壯不減江浙兼賜名
禮賢宅以待李煜與元帥先朝者即賜之夷簡受
天誥俛首而歸私自籌曰茲事大難王或果以去
就之計見決於我胡以為對迨歸見俶因不匿盡
以天訓授之遂稱疾於安溪別業保身潛遁夷簡
山居詩有宿雨一番蔬甲嫩春山幾焙茗旗香

玉壺

清話

晉江曾魯公公亮楚公會于也初草堂僧戒行高漢
楚公遇之甚厚僧曰願後身為公子報公時楚國
夫人方娠一夕夢僧來訪問訊遽寤子公亮生則
僧已示寂矣

閩書

宋王沂公會字孝先其先晉江人武肅王審邽六世
孫少隨父克官益都父卒貧不能歸因家焉後曾

孫判賀州熒回居泉州

閩書

閩人有謝伯初者字景山當天聖景祐之間以詩知
名予謫夷陵時景山方為許州法曹以長韻見寄
頗多佳句有云長官山色江波綠學士文華蜀錦

張予答云衆軍春思亂如雪白髮題詩愁送春蓋
景山詩有多情未老已白髮野思到春如亂雲之
句故予以此戲之也景山詩頗多而仕宦不偶終
以困窮卒其詩今已不見於世其家亦流落不知
所在其寄予詩逮今三十五年矣予猶能誦之蓋
其人不幸既可哀其詩淪棄亦可惜因錄於此詩
曰江流作險似瞿塘滿峽猿聲斷旅腸萬里可隨
人謫宦經年應合鬢成霜長官山色江波綠學士
文章蜀錦張異域化爲儒雅俗遠民爭識校讐郎
才如夢得多爲累情似安仁久悼亡下國難留金

馬客新詩傳與竹枝娘典辭懸待修青史諫草當
來集阜囊莫謂明時暫遷謫便將纓足濯滄浪

六

詩話

天聖七年予始遊京師得吾友謝景山景山少以進
士中甲科以善歌詩知名其後又得今舍人宋公
所爲景山母夫人之墓銘言夫人好學通經自教
其子乃知景山出於甌閩數千里之外負其藝於
大衆之中一賈而售遂以名知於人者繫其母之
賢也今年予自夷陵歸許昌景山出其女弟希孟
所爲詩百餘篇然後又知景山之母不獨成其子

之名而又以其餘遺其女也景山學杜甫杜牧之
文以雄健高逸自喜希孟之言龙隱約深厚守禮
而不自放有古幽閒淑女之風非特婦人之能言
者也然景山嘗從今世賢豪者遊故得聞於當時
而希孟不幸爲女子莫自章顯於世昔衛莊姜許
穆夫人錄於仲尼而列之國風今有傑然巨人能
輕重時人而取信後世者一爲希孟重之其不泯
沒矣予固力不足者復何爲哉希孟妹進士陳安
國卒時年二十四

六一居
士集

崔唐臣閩人也與蘇子容呂晉叔同學相好二公先

登第唐臣遂罷舉久不相問嘉祐中二公在館下
一日忽見艤舟汴岸坐於船窓者唐臣也亟就見
之邀與歸不可問其別後事曰初倒篋中有錢百
千以其半買此舟往來江湖間意欲所往則從之
初不爲定止以其半居貨間取其贏以自給粗足
卽已不求有餘差愈於應舉覓官時也二公相顧
太息而去翌日自局中還唐臣有留刺乃攜酒具
再往謁之則舟已不知所在矣歸視其刺之末有
細字小詩一絕云集仙仙客問生涯買得漁舟度
歲華案有黃庭尊有酒少風波處便爲家訖不復

再見頃見王仲弓說此

避暑錄話

墨妙堂在奉先院中林少卿以東壁有蔡忠惠詩因以墨妙名忠惠東壁詩曰日照溪山生翠光春深花草雜幽香登臨誰識遲留意門外塵埃去路長末云莆陽蔡襄慶歷四年二月二十日入延福寺登秦君亭觀白雲井訪北臺還書奉先東壁忠惠字刻在泉郡凡六三在寺一在州治一在郡庠一在洛陽之浹在寺者此其一也

開書

蔡確車蓋亭一案朝論忿爭凡理確者皆坐確黨免

黜劉器至謂確包藏禍心脾睨兩官按揮塵錄吳

處厚始諂事確後以推治舒亶獄為確所怒確既

守安州處厚知漢陽兩人益交惡會漢陽吏至安

州確問處厚近况吏誦其秋興詩云雲共去時天

杳杳雁連來處水茫茫確笑曰猶亂道如此吏歸

以告處厚怒曰我文章蔡確乃敢譏笑耶會安州

有舉子販米至漢陽規免和糴乃謁縣令陳當且

言離鄉里時蔡丞相作車蓋亭詩十章舟中有本

歸舟以詩送之處厚得詩於當遂箋注上之謂其

子柔嘉曰二十年深讐今報之矣其子問知其詳

泣曰此非人所為大人何以自立於世處厚悔悟

遣健步追之則文書已投矣然則處厚與確不過
語言責望遂造大獄確之為人固死有餘罪然告
許一倡卒此縉紳之禍可歎也

純翁類藁

文公為同安主簿日民有強力得人善地者索筆題

曰此地不靈是無地理此地若靈是無天理後得

地之家不昌

堯山堂外紀

宋幼主過泉城宗室欲應之守郡者蒲壽庚閉門不

納及張世傑回軍攻城宗室又欲應之壽庚置酒

延宗室欲與議城守事酒中盡殺之

泉州府志

夏秦字西仲元季進士不知何許人避亂居此郡守

胡器與部使者多造其廬洪武十六年召至京師

以老乞歸簞瓢屢空處之安如有送郡守詩離筵

當芳草去路遶青山日暮雙旌遠邦人拭淚看時

稱為二十顆明珠用賓奉祀之日為文以祭曰幸

隻字之見貽雖兼金而莫擬

閩書

閩中洛陽橋圯發石有刻文云石頭若開蔡公再來

明永樂中鄞人蔡錫知泉州欲修橋橋跨海工難

施錫無可為計欲以文檄海神忽一醉卒趨躄而

前曰我能齋檄往復乞酒飲大醉自沒於海若有

神擎捧之者俄而以醋字出錫意必八月二十一

日酉時也遂於是日舉工潮旬餘不至工遂成語
載錫本傳中此實事也人不知而以事附蔡端明
且以爲傳奇中戲妄之語非也

鈞廓
偶筆

正德末年多虎患小坪民有捕石鱗魚者夜墮虎穴
中中虎子三穴深陡無所緣自分必死矣俄而虎
噬一豕入張目而視者久之乃嚙其豕爲四三與
子一與捕魚者復跑而上後數歸皆然捕魚始甚
苦之卒勉食如是者閱六七日一夕虎三負其子
以出已復躍而下捕魚者遂跨其背以上相隨至
林薄外捕魚者謂虎曰而恩我至矣他日幸吾鄉

吾願以牛爲謝抵家數月鄉人檻得一虎捕魚者
聞之前謂鄉人曰是無乃生我者乎視之已不復
識別乃謂虎曰果生我者則三號以爲信虎帖尾
俛首而號者三遂宰牛以食衆而出之

同安
縣志

劉淵材憾曾子固不能詩予嘗見宋人所輯唐宋八
家詩則子固與焉不得謂非詩家矣評明人詩者
不及王道思然道思五言古文文理精密足以嗣響
顏謝而論者輒言文勝於詩非知音識曲者也

靜
志

居詩
話

嘉靖辛卯陳公讓往秋試求夢九鯉湖是夕無夢廟

中道士夢神曰前度劉郎今又來令其告陳陳亦不解是科陳中解元始知前科解元劉汝楠陳即前度之劉也陳晉江人劉同安人

閩省賢書

蔡少叅一槐年十四中庚子榜御史王瑛啓牘謂年太少姑留後科鹿鳴宴日特設宴期之及癸卯再雋泉年少登科又享耆壽一槐一人兼之鹿鳴兩

宴亦異數也

閩省賢書

張襄惠公岳以二十歲發解閩中時天下省會皆有中官鎮守舉子例合叅謁則皆跪見公長揖而已

中官志曰今歲解元豈琉球生耶

閩書

隆慶庚午鄉試合順天榜兩元五十八士省元為同

安林竒石北畿領解則李文節公也是科之彥其第進士者二十有四人文節公則鼎甲拜相為一代偉人自庚午至萬歷癸卯十二科吾泉領解有十辛卯五魁皆泉人丙戌會榜泉得二十有一人

鄉會試科名之盛如此

溫陵舊事

隆慶二年巡按御史邵光先劾遼憲熾大罪十三命刑部侍郎洪朝選往勘具得其淫虐僭擬諸罪狀帝以憲熾宜誅念宗親免死廢為庶人錮高牆初副將施篤臣憾憲熾甚朝選至湖廣篤臣詐為憲

燦書覬朝選因劫持之憲燦建白燾曰訟寃之燾
 篤臣驚曰王反矣使卒五百圍王宮朝選還朝實
 王罪不言王反大學士張居正家荊州故與憲燦
 有隙嫌朝選不坐憲燦反屬巡撫勞堪羅織朝選
 死獄中其後居正死憲燦訟寃籍居正家而篤臣
 亦死遼國除明史

隆萬時士皆着白布袍李文節公娶親內白布袍而
 與友借色衣其上親去郡數十里將至五六里許
 偶出簷風掛其前裾裂徑尺從人走遠村丐針線
 綴之公徐步而行時已暮遇迎親者數輩問曰曾

見有娶親與從否有識公者曰即李丈也而獨行
 何公語之故迎親者曰日已近暝不妨同行以候
 尊從之至及門而終不至也其丈人喜極自出迎
 之公竟以白布袍登堂有頃方易衣成禮及公解
 元會元鼎甲拜相與夫人至老相莊夫人尙後公
 歿也溫陵舊事

楊貫齋公道會為郎值江陵相寢疾六曹堂官皆為
 設齋祈福大司空出俸金首事公謂此臣子事君
 父禮某不敢預聞者皆為公愚而江陵相自此不
 起公亦未嘗自言後以楚方伯入計李文節公時

為言者所攻，逆居荒廟。公每過從談，至夜分。公為誦白沙詩：茫茫宇宙人無數，幾箇男兒是丈夫。以

壯其志云。

續小學

黃東崖相國和予寄周芮公先生詩中一聯曰：徵書鄭重，眠餐損法曲。淒涼涕淚橫。知已之言，讀之感歎。

明季鄭芝龍海大寇也，歸誠後貴顯，嘗朝京師。過龍虎山，有異人為決未來事，語甚隱然，意欲跨土稱孤，爭衡南面者。末云：金雞唱龍種，消後靖海侯。施琅以辛酉生，其專征又以辛酉年龍種者。芝龍子

孫也。余十五六時便聞斯語，後二十餘年而驗。

貞裕

村集

閩詩派自林子羽高廷禮後三百年間，惟鄭繼之。曹

能始能自見本色耳。丁雁水、煒亦林派之錚錚者。

其五言佳句頗多，如：青山秋後夢黃葉，雨中詩鶯

啼殘夢後花發。獨吟時花柳看憔悴，江山待被除

皆可吟諷。丁晉江人歷官湖廣按察使。

漁洋詩話

丁煒雁水有女名報珠，能詩。越中寄父云：遙望白雲

飛欲迴，親幃長隔薊門隈。憑闌鄉國知何處，寂寞

庭前花又開。未嫁而卒，雁水哭以詩云：女美生前

白傅誇清心麗質比幽花鳳凰未駕釵先折
寥落簫聲隔絲霞
堯井叔謂其情至之語不堪多讀

詩集

同安順治年間杏根塘有騎兵挾女數十一女散髮
出馬自沉於水索之不得四五日後有弟自漳來
匣塘一慟屍自浮出竅血汪然

府志

福建續志卷九十一終

福建續志卷九十二

雜記四 叢談

漳州府

名第山本名天城山唐周匡物讀書此山登第後勅
賜名第以漳人及第自匡物始也匡物登第一時
同擢者三十三人有贈之詩云元和天子丙申年
三十三人共得仙今漳南五里有名第院祀匡物
而山又有得仙亭蓋取贈詩語劉禹錫詩有危亭
誰結據山椒名第山人不可招之句匡物自題云
窓外捲簾侵碧落檻前敲竹響青冥

閩書

白居易長慶集有送呂漳州詩而守名無考歐陽詹
有送楊據見漳州李使君序而亦遺其名漳州府志

南山寺有扁書悠然二字相傳為唐太傅陳邕女名
金者翦髮出家以髮濡墨書之字體道雅或云原

有悠然寺三字乃越王女元繡所書後改寺名故

僅存悠然二字與碑記所載不同漳州府志

董思安南唐時漳州刺史也莆志載其忠於王氏建

州入南唐思安奔泉州南唐以為漳州刺史相傳

謂思安父名漳故改漳州為南州然實南唐定王

氏亂後乃改州名見南唐書時思安適為刺史耳

又閩王曦有諫議大夫王峻者見曦多誅宗室昇

櫬極諫貶漳州司戶參軍五代史亦稱其忠附載

於此龍溪縣志

李防禦公以破賊功知名南服還漳過羅浮為先君

留十日飲過方待行具見其事不踰年公還朝宰

相薦換右列付方面蓋欲以功名委焉而公逡巡

退避終老於鄉里此非進退出處在我安能以清

節照世乎蘇過跋李亨伯遺集後

陳氏曰奉議郎吳與家藏文集閩中不經兵火故多

完具鄭樵曰古之書籍有上代所無而出於今民

問者古文尚書音唐宋並無今得於漳州之吳氏其書目自算術一家有數種又師春二卷甘氏星經二卷漢官典義十卷京房易鈔一卷今世所傳俱出吳氏三館四庫所無也淳祐府志云圖經序承議郎吳與所作見清漳集團經久已無傳所存者序耳

漳州府志

漳州地連潮陽素多象往往十數為羣然不為害惟獨象遇之逐人蹂踐至骨肉糜碎乃去淳熙初趙公綱為守聽民捕象齒牙毋輸官民率用命其種

遂絕

墨客揮犀

劉宗道講學遠師北溪其闢釋老甚嚴目佛為泥塑集中有同安歎云噫嘻吁紫陽之化衰家家呵彌儒也墨衣墨也墨衣滿城遊遨誰我知不如歸也不如歸又遊天蓋寺詩云若無僧寺塔直是一唐虞斯亦能言距楊墨者已

靜志居詩話

周公宣賢以延平守擢巡海觀察使行至溫陵會倭寇大舉漳泉道梗公乘舟由海趨漳中途颶風大作舟幾危公神色不動須臾風止兼晝夜以濟至月港人尚未知觀察公來公為憇一宿開城撫諭時人心惶惶至是始帖然

漳州府志

張童子名于壘字凱甫友人燮紹和之子也年七歲賦詩有明月小池平之句年十四紹和攜之至三山與徐興公諸賢卽席分韻童子倚待立成四座閣筆已復侍紹和徧遊吳越三楚所至皆有詩年二十一卒

天啓甲子鄉試漳州諸生顏茂猷首場作四書五經題共二十三篇用雙行繕於卷時臚錄所官以違式爲請監臨喬公憐其積學特命錄其本經以進中式十八名第茂行亦同舉

閩省賢書

黃石齋講學江東每臨講時堂設先聖位具琴瑟鐘

鼓立監史讀誓戒獻酬歌詩主賓百拜四方學環江門而來聽者千艘時比之河汾亦一時盛事

去龍溪縣志

黃石齋先生蔡夫人名潤石字玉卿工書法與先生逼似康熙庚辰春得其楷書律詩一卷楷法稍雜分隸題云偶寄夏太守時山中聞警崇正丙子秋八月蔡氏玉卿書於石養山中詩多崇正中魔道語蓋先生作也

居易錄

龍溪閨秀周仲姬著二如居集有植竹示兒子云虛心能破石轉眼已凌雲讀先忠愍公傳云後死七

人無復恨先生千載有餘悲可詠也

龍溪縣志

延平府

唐天復元年杜德祥榜放曹松王希羽劉象柯崇鄭希顏等及第時上新平內難聞放新進士喜甚詔選中有孤貧之人宜令以名聞特勅授官故德祥以松等塞詔各授校正松舒州人希羽劍州人甲子皆七十餘象京兆人崇希顏閩人亦俱年逾耳

順時號五老榜

金闕詩話

韓偓在昭宗時為翰林學士承旨頗與國論為崔允朱全忠所不容謫濮州司馬其後復官不敢入朝

挈其族依閩中王審知嘗道沙陽寓於天王院者歲餘與老僧蘊明善以詩贈之至後唐時邑令張僚為之記

李忠定文集

廖正一字明畧將樂人元豐間與晁補之同榜晁贈廖詩云十年山林廖居士今隨詔書稱舉子文章宏麗學西京新有詩聲似侯喜山谷詩云廖侯言如不出口銓量今古大如斗度越崔張與二班古風蕭蕭筆追還有詩號白雲集元祐中召試館職除正字東坡大奇之歎賞其策每以密雲龍茶飲之時黃秦晁張號蘇門四學士故名亦得亞於四

學士後入元祐黨尚友錄

周謂尤溪人字希聖宋熙豐間人知廣之新會縣不

肯奉行王安石新法有寄子弟詩頗不入宋格一

時門人稱周夫子其風致可想也又著孟子解義

禮記說亦一博學之士谿山餘話

宣和五年順昌廖懋致政家居役夫解柿木為薪木

中有文曰聖元天何四字字體端楷黑色瑩然延平

府志

陳瑩中了翁嘗言蔡京若秉鈞軸必亂天下後為都

司力排蔡氏之黨一日胡會與蔡觀同語云公大

阮真福人也問何以知之了翁曰適見於殿庭日

視太陽久之而不瞬觀以語京京謂觀曰汝為我

語瑩中既能知我何不容之甚也觀致京語於了

翁徐應之曰射人先射馬擒賊先擒王觀默然後

竟有郴州之命春渚記聞

鄧志宏號柝欄與朱韋齋交好一日韋齋觴客柝欄

以冠帶寓之醉起韋齋留以質紙筆明日如約韋

齋受筆還冠而紙少留帶曰倘無千幅竟不還柝

欄為寄一詩曰歸帽納毫真得策要牋留帶計還

疎公如買菜苦求益我已忘腰何用渠閉戶羽衣

聊自適推牕柿葉對人書帝都聲價君知否寄與
新傳折檻朱前輩風流調笑藹藹如此

谿山
餘話

南平吳恭永樂乙酉吳寧永樂丁酉吳珙成化乙酉
俱中鄉試二十六名俱系吳姓俱酉科亦一異事

也

延平
府志

建寧府

宋江淹有遊黃檗山一首蓋江曾爲浦城令遊福清
之黃檗山也湖州杼山西南五里亦有黃檗山顏
魯公作妙喜寺碑銘以爲江淹賦詩之所似未詳
審詩中語江詩云長望竟何極閩雲連城邊已顯

言閩矣又云南州競竒怪赤縣多靈仙金峰各虧
日銅石共臨天是山有十二峰最高也又云陽岫
照鸞采陰厓噴龍泉是山有龍潭九處也又云殘
機千代木翠厔萬古烟禽鳴丹壁上猿哺青嵒間
是山至今古木陰翳若梁代又不知何如其蔽虧
也又云况我葵藿志松木橫眼前此正淹爲令尹
時望闕而作也若湖州之黃檗不過山清水秀而
已與此詩全不合矣浦城縣三國吳曰吳興至唐
始改爲浦城按淹本傳宋建平王景素好士淹隨
景日久後黜淹爲建安吳興令卽今之建寧浦城

令也魯公誤以吳興為湖州此又是一證因樹屋書影

李義山龍邱途中詩云漢苑殘花別吳江盛夏來惟看萬樹谷不見一枝開水色饒湘浦灘聲怯建溪淚流迴月上可得更猿啼按龍邱秦太末縣歷代沿改不一唐貞觀中復置龍邱縣屬衢州唐書地理志衢州為江南道蓋古揚州南境本吳地故前首曰吳江盛夏來也龍邱南接建州故次首曰灘聲怯建溪也中卷有武彞山詩武彞山在建州愚以為義山踪跡未至觀此二詩豈義山嘗從衢州而至建州耶本傳未載不可考也李詩箋註

梨嶺路通衢州江山厥土宜梨宋楊億談苑云天下

水皆東獨梨嶺水北流入廣信唐歐陽詹詩南北

風烟即異方連峰危棧倚蒼蒼哀猿咽水傍高處

誰不沾衣望故鄉問書

宋楊侍讀徽之以能詩聞太宗知其名索其所著以

百篇獻上卒章曰少年牢落今何幸叨遇君王問

姓名太宗和賜且語近臣曰徽之文雅可尚操履

端正拜禮部侍郎選十聯寫於御屏梁周翰詩曰

誰似金華楊學士十聯詩在御屏風宋稗彙抄

楊文公初為光祿丞太宗頗愛其才一日後苑賞花

宴詞臣不得預以詩貽諸館閣曰聞帶官花滿鬢
紅上林絃管侍重瞳蓬萊咫尺無因到始信仙凡
迥不同諸公不敢匿以詩呈上詰有司所以不召
左右以來貼職例不得預卽命直言院免謝令預
晚宴時以爲榮

澠水燕
談錄

前輩嘗說北朝致祭皇后文楊大年捧讀空紙無一
字隨自誤曰惟靈巫山一朵雲闌苑一團雪桃源
一枝花秋空一輪月豈期雲散雪消花殘月缺伏
惟尚饗仁宗大喜其才敏給有壯國體

宋稱
類抄

楊億家集載真神哲三宗皆自十三仙中出世真人

吳懷玉亦嘗醉中指武彝君像曰應世人主實在
戊子未幾哲宗登極果符其年又指魏真君像曰
三十有八載當撫平四海後果然是以陳覺民過
武彝詩云昇真洞口接天門靈艸丹花日日春聽
說列仙來瑞世三朝德澤在斯民

閩書

柳永字耆卿爲舉子時多遊狹斜善爲歌詞教坊樂
工每得新腔必求永爲詞始行於世於是聲傳一
時初舉進士登第爲睦州掾舊初任官薦舉法不
限成考永到官郡將知其名與監司連薦之物議
喧然及代還至銓有謫以言者遂不得調自是詔

初任官須滿考乃得薦舉自永始永初為上元詞
 有樂府兩籍神仙梨園四部絃管之句傳禁中多
 稱之後因秋晚張樂有使作醉蓬萊詞以獻語不
 稱旨仁宗亦疑有欲為之地者因置不問永亦善
 為他文詞而偶先以詞得名始悔為累後改名三
 變而終不能救擇術不可不慎予仕丹徒嘗見一
 西夏歸朝官云凡有井水飲處即能歌柳詞言其
 傳之廣也

避暑錄話

徐大正字得之甌寧人少舉進士便馬善射慷慨有
 氣畧其赴省試過釣魚臺題詩蘇東坡見之遂與

定交及入仕齒髮不衰輒欲處閒就幽嘗築室北
 山下為閒軒居之秦少遊為之記而東坡為賦詩
 人以北山學士呼之

閩書

李彌遜宿觀妙堂遇雨既度復回一日竟遊九曲而
 行賦詩二首朱子跋云觀妙堂東楹李侍郎遺墨
 語意清婉字畫端勁至其下輒諷玩不能去然歲
 久剝裂又設當供帳處後十數年當不復可讀矣
 別為模刻授道士使寘壁間庶幾來者得以想見
 前輩風度李公諱某時以力抵和議出守臨漳云
 慶元乙卯正月新安朱某謹奉書

宋詩紀事

世以考亭稱文公予癸巳陪巡過建陽宿麻沙見晦翁後人所藏家譜知考亭是黃氏之亭後從徐存永得見黃詩按五季亂黃瑞公子稜隨父禮部尚書入閩見建陽山水秀麗遂家焉子稜詩云青山木笏尚初官未老金魚是等閒世上幾多名將相門前無此好溪山市樓晚日紅高下客艇春波綠往還人過小橋頻指點全家都在畫圖間歿而葬於三桂里子稜乃築亭於半山以望其考因名曰望考文公居近其地世因以考亭稱之以地稱人可也以他人之考稱文公於理甚悖然公在日實

無以此稱之者後人誤謬急當改正

閩小紀

毛詩補音十卷陳氏曰吳棫撰其說以爲詩韻無不叶者如來之爲釐慶之爲羗馬之爲姥之類詩音舊有九家唐陸德明始定爲釋文燕燕以南韻心沈重讀南作尼心切德明則謂古文韻緩不煩改字揚之水以沃韻樂徐邈讀沃鬱縛切德明亦所不載顏氏糺繆正俗以傅毅郊祀賦穰有而成功張衡東京賦激有吉躡切今之所作大畧倣此其援據精博信而有證朱晦翁註楚詞亦用棫例皆叶其韻棫又有韻補一書不專爲詩作也要之古

人韻緩之說最爲確論不必一一改字詳見韻補

文獻通考

建安郭周孚未第時夢人以詩一聯示之云雞人唱曉沉潛際漢殿傳聲彷彿間郭於夢中口占續之云自慶寒儒千載遇夢魂先得覲天顏繼以余中榜發甲科初與同袍伏闕以待唱第忽聞岌岌間有連聲長歌了不成詞調不覺問其旁坐有應之者曰此所謂雞人唱曉也郭欣然悟前語之先定後恬於仕進官至員外郎所至以清慎稱春渚紀聞朱懷英字習老建安人建炎初應詔上書云懷王以

萬五千里楚地帶甲百萬不能報父兄之辱臣常憤此願爲朝廷銜命責之以義而大兵繼進臣雖不免酈生之烹亦足仰成陛下孝弟之志雖死猶生也時方議和不果用呂頤浩贈詩有滔滔天下皆如此無人解作朱君語之句建寧府志

張南軒見胡仁仲仁仲辭以疾他日見孫正孺而告之孫道五峰之言曰渠家好佛見他說甚南軒方悟前此不見之因於是再謁之語甚相契遂授業

焉南軒曰杖若非正儒幾乎迷路建寧府志

洪武乙丑會試取中四百七十二名黃子澄第一練

子寧第二花綸第三殿試有司奏綸第一子寧次
之子澄又次之先一夕上夢殿前一鐵巨釘綴白
絲數縷悠然日下覺以語左右莫知爲何祥及拆
狀元卷乃花綸也上喙其不叶夢取第二人爲首
已而得丁顯卷姓名與夢相符擢爲狀元顯時年
二十八子寧次之綸又次之三人皆拜修撰子澄
抑置三甲爲翰林庶吉士久之亦授修撰云或傳
童謠曰黃練花花練黃上惡其語以綸及子澄年
少高科故抑之也顯字彥偉建陽人

二藍集閩人無知者何氏閩書藍仁有藍山集藍智

有藍澗集竹垞嘗輯入詩綜中以爲十子之先聞

中詩派實其昆友倡之集本合刻吳明經焯嘗於

吳門買得藍山集是洪武時刊有蔣易張渠二序

與竹垞言脗合而藍澗究不可購徐惟和輯風雅

時二藍闕焉則此集之亡久矣榕陰詩話 按前
志文苑傳云智字

明之山字靜之
以仁爲山大誤

閩有貧生客京師饑寒濱死然頗善丹青不能售一

錢因以兩幅獻於楊文敏公榮公題其上而還之

詩云誰家老屋沈溪濱十里青山半是雲此處更

無塵跡到祇應啼鳥隔花聞其二云小橋流水漾

晴沙策杖歸來日未斜昨夜東風花落盡一林高
樹鎖烟霞明日張此畫於市價遂湧人爭延致因
而饒裕閩小

政和徐貞一號元虛子能詩嘗過仙霞關關吏訝其
異服執之貞一瞪目不答吏繫之郵亭迨夜給守
者出袖中出大筆書二絕於壁云一劍凌空海色
秋玉皇賜宴紫虛樓醉來跨鶴須彌頂指點培塿
見十洲碧殿歌傳阿濫堆玉笙吹徹海桃開仰天
一嘯江風發笑接白雲歸去來乘夜遁去晨起盛
傳仙人至關走看墨跡不絕於道筆精

邵武府

江南李氏樂人王感化建州人隸樂籍建州平入金
陵教坊善為詞時本鄉節帥更代餞別感化前獻
詩曰旌旆赴天台溪山曉色開萬家悲更喜迎佛
送如來談苑

李巽字仲權邵武人以蜃樓土鼓周處斬蛟三賦馳
名累舉不第為鄉人所侮曰李秀才應舉空去空
回知席帽甚時得離身巽亦不較至是乃遺鄉人
詩曰當年踪跡困泥塵不意乘時亦化鱗為報鄉
閭親戚道如今席帽已離身蓋國初猶襲唐風士

子皆曳袍重戴出則以席帽自隨異後仕至度支
郎中兩浙轉運使卒與王禹偁相友善今小畜集
有送李中權赴官序卽異也青箱雜記

謝成甫皇祐中五試皆第一後宰清江歲大饑出郊
發粟以賑值除夕家人以書促歸成甫批紙尾云
歲節不歸第不飲數十杯酒耳人失食奈何竟宿

於外

邵武府志

蔡京父子在京城之西南坊對賜甲第四區極天下
土木之工一曰太師第乃京之自居也二曰樞密
第乃攸之居也三曰駙馬第乃倅之居也攸妻劉

乃明達明節之族有寵而二劉不能容乃出嫁攸
權寵之盛亞之京攸四第對開金碧相照嘗見上
官仲恭詩一編其間有城西曲言蔡氏侈奢敗亡
之事最爲豪健末句云君不見喬木參天獨樂園
至今猶是溫公宅仲恭乃彥衡之子也惜其詩不
行於世朱子語類

李伯紀丞相過海絕句云假使黑風漂蕩去不妨乘
興訪蓬萊與坡公九死南荒吾不恨茲遊竒絕冠
平生之句殆相伯仲異乎李文饒盧多遜窮愁無

慘之作矣

後邨詩話

紹定庚寅春汀寇入樵趙守竄殿司裨將胡斌領弱卒二百巷戰矢盡片折易雙鐵鞭所殺尤衆死焉坐執雙鞭屢日不僵民賴其力多獲竄免守臣王埜聞於朝賜武節大夫賜廟額忠勇劉後村詩云士各全軀命惟侯視死輕張巡鬚盡怒先軫面如生短刃猶梟寇空卷尙背城新祠簫鼓盛人敬此

神明隨隱漫錄

建寧童子徐志夏年十三隨父立恭入山父爲虎所攫志夏號泣追之虎擲父於地距其旁睨志夏志夏抱父大哭虎注視良久舍去父子俱得無害開居偶錄

余報喜余延僕也延家貧將鬻報喜報喜泣曰願終身事主於是織屨販蔬竭力以供朝夕後稍豐舍業酤釀治酒肴以進如是者二十年延死喪事皆取辦焉不數日報喜亦死開居偶錄

汀州府

亭亭畫舸繫春潭只待行人酒半酣不管烟波與風雨載將離恨過江南嘗有人客舍壁間見此詩莫知誰作或云鄭兵部仲賢也然集中無有好事者或填入樂府仲賢當前輩未貴杜詩時獨知愛尙往往造語警拔歐陽文忠公稱其張僕射園中一

聯以為集中少此恐公未嘗見其全編蔡寬夫詩話

劉氏女寧化人生不如暈艷慧喜文九齡與羽人談

道自誓不嫁及笄父母以許石城何氏子卜吉強

行淡飾就車劉氏聚族送之甫越境忽有白鵝從

天下乘之飛去莫窮所往眾異之物祠乘鵝之地

郡守陳軒過其下題詩云白鵝乘去人何在青鳥

飛來信已遙若使何郎有仙骨也須同引鳳凰簫

閩亭

九龍灘上下二十餘里每過一灘兩岬石峽如闕水

中石高可數丈如龍橫截其間屈曲如之乘舟直

下一似墜天稍失手即百能不救凡舟至此須沾

酒市牲拜禱龍王舟人更取竹編簣裹船頭以

拒浪倩本土最能者為之攔護然後敢下者舊傳

聞宋元時舟楫不通元陳有定始鑿以運汀糧然

張籍寄元汀州詩有為郡暫辭雙鳳闕全家遠過

九龍灘之句則唐時已行舟矣閩書

順治丁酉清流賴氏釀酒彌月啓簞視之爛然成花

似茉莉而瓣差小具五色外丹而內瑩然如玉邑

人李于堅作酒花詩周櫟園方伯亟稱之汀州府志

上杭令陳正中上海人為入刻意廉苦勤于民事時

咯血垂殆猶治簿書有市民曉起出戶見公儀仗
入城隍廟不解何故至縣探之則公已平明屬纊
矣仁恕堂
筆記

長樂吳樸齋名朝建嘗拾琉球人遺布躬負還之好
讀書有武力嗣補寧化千夫長因入籍焉隨制府
滿公保於廈門多建白又隨提督施公世綸平臺
灣功最多超擢連江遊擊愛人禮士每留心國計
民生歸老家連江結九老會雅歌投壺有需將風

長樂志
武勳類

福寧府

霍童山之香爐峰乃司馬承禎修煉處李太白時訪
之承禎謂其有仙風道骨可與神遊八極之表白
詩云家本紫雲山道風未淪落沉懷丹壑志冲賞
歸寂寞竭來遊閩荒捫步涉禹鑿夤緣泛湖海偃
蹇陟廬霍閩書

鄭夢錫昌齡弱冠舉進士有才名秦檜欲羅致門下
令客啖以美官夢錫作詩云先生傲睨醉官旁不
免蹉跎入醉鄉來書恐是夢中語使我大笑譏荒
唐檜雖恚而不能害也長溪
瑣語

康輿之在高宗朝以詩章應制與左璫狎適睿思殿

有徽祖御畫上時持玩以起羹糲之悲璫下直竊
攜至家而與之適來留之飲因出示之唐給璫入
取殺核輒書一絕於上曰玉輦宸遊事已空尚餘
奎藻貯春風年年花鳥無窮恨盡在蒼梧夕照中
璫見之大駭然無可奈何明日伺問叩頭請死上
大怒亟取視之天威頓霽但一慟而已娛書堂詩話
元至正末陳有定據閩入寧德過棲雲忠烈祠入謁
叩已當為天子否神懸箕書詩云將軍何事訪仙
家火冷爐灰漫煮茶若問聖明吾豈敢只能療病
與驅邪有定不懌而去長溪瑣語

壽寧縣東街民婦繆氏紡至二更出門見布政司街

裂為河數丈有男女往來身服紅綠綺衣內列器

用燈燭熒熒頃之如舊建寧府志

蔡景榕寧德諸生能詩嘉靖辛酉五月倭破縣城擄

之歸至海西道薩摩州麀塢郡髡其首奴使之困

苦備極後依松源山南林寺老僧俊可異而詢之

景榕書大明秀才示之僧因試以芙蓉詩景榕援

筆立就僧乃留之寺中命錄書經典及太平記倭

國玉篇等書逾年景榕求歸甚切僧與眾議欲妻

之且給以田景榕題雁詩於便面曰金風蕭瑟碧

天秋淺水平沙亦暫遊萬里青霄終一去野鳧無
計漫相留僧知其意不復強乃潛命畜髮有漳州
通番舶至懇於僧得附歸聞於官仍復諸生後以
歲薦官至隨州廣文

長溪瑣語

陳啓東震諭學寧德嘗作詩述閩人鄉談云蠻音鳩

舌語胡塗雨落翻將禍斷呼誰信健佻原是耍怎

知詐講却云誣

吳人稱說謊也

猶言李家門前老酒沽昨聽鄰家罵新婦聲聲明白喚

狸奴

其罵聲云貌貌即貓叫聲如吳人云杜貨也

閩人聞之亦為絕倒

石田雜記

臺灣府

泉郡志云東出海門舟行二日程曰澎湖與在巨浸

中環島三十六如排衙然昔人多僑寓其上苦茅

為廬推年大者為長不畜妻女耕漁為業牧牛羊

散食山谷各務耳為記訟者取決於晉江縣城

外貿易歲數十艘為泉之外府後屢以倭患墟其

地或云抗於縣官故墟之今鄉落屋址尚存唐施

肩吾島夷行云腥臊海邊多鬼市島夷居處無鄉

里黑皮年少學採珠手把生犀照鹹水即其處也

今澎湖已設遊兵汛守焉

泉南雜志

朱文公登福州鼓山占地脉曰龍渡滄海五百年後海外當有百萬人民之郡今歸入版圖適符年數

赤嵌筆談

水至澎湖漸低近琉球謂之落溜溜者水趨下而不

回也凡兩岸漁舟到澎湖以下遇颶風發漂流落

溜回者百無一二續文獻通考

明崇正庚辰閩僧一貫居鷺門見籬外陂陀有光連

三夕異之因掘地得古甌上有古隸四行其文曰

草雞夜鳴長耳大尾千頭銜鼠拍水而起殺人如

麻血成海水起年滅年六甲更始庚小熙皞太和

千紀凡四十字閩縣陳衍磐生著槎上老舌一書

備紀其事至 國朝康熙癸亥四十四年矣識者

曰雞酉字也加草頭大尾長耳鄭字也千頭甲字

鼠子字也謂鄭芝龍以天啓甲子起海中為羣盜

也明年甲子距前甲子六十年矣庚小熙皞寓年

號也前年克復金門廈門今年克澎湖鄭克塽降

六十年海氛一朝盪滌此固 國家靈長之福而

天數已豫定矣異哉池北偶談

海上黑夜不見一物則擊水以視一擊而水光飛濺

如明珠十斛傾散水面晶光瑩瑩良久始滅臺海見聞

陸提萬正色有海舶之日本行至雞籠山後為東流
所牽抵一山下舟中四人登岸探路見異類蛇首
猙獰馳攫一人共噉之三人逃歸於莽中遇一泉
人攜之登舟道妖噉人狀泉人曰往余舟至同侶
遭噉惟余獨存以項有雄黃一物不敢近耳適舟
中有雄黃因各把一握頃之蛇首人數百奔來將
近不敢仰視逡巡而退

臺灣縣志

臺灣草木經歲不萎花開無節黃巡方叔琬云余仲
冬接部至斗六門見桃花方盛至笨港見人擎荷

花數枝回署見榴花照眼張巡方湄有直箇四時
皆似夏荷花度臘菊迎年之句

臺灣見開錄

永春州

莊少師夏既卒寧宗贊其像云天生美質學業逍遙
堅冰志操歷視三朝忠言逆耳書史所標宗祀繁
衍百世不祧其被遇如此

永春舊志

田公一儁歷官二十餘載人莫知其貧迨疾革門士
更直侍臥榻見所食用率粗糲疏布然後知其蕭
然同寒士也

延平府志

龍湖寺舊有鐘聲聞數里明末邑令某命移於醒龍

樓未至僧追及之以指蹕者三撞擊之無聲矣又湧溪沙際有鐘罅裂旁落一片如掌取而合之洪水蕩決終不去

德化縣志

德化磁簫笛色瑩白式亦精好但累百枝無一二合

調者合則聲悽朗遠出竹上雲夢柯亭之外又有

此異種入李暮手即至入破當不患駭然中裂耳

閩小紀

福州有庠士某者當歲丁卯夢鼓樂導解元扁入其

家竊自負德化蕭宏梁應試求賃某以其小邑人

意輕之賃以偏室及榜發解元乃蕭也

德化縣志

龍巖州

新羅城一云在龍巖漳州志云在汀州境一統志云

唐開元末於新羅故城東置長汀寰宇記開元末

新羅令孫奉先晝假寐夢一人曰吾新羅山之神

從府主求一牛食按此則新羅乃山名當在長汀

之西非今之龍巖城即古之新羅城也

汀州府志

龍巖州北四十里有山曰孝山縣官始至則祭之或

暮夜乃入明知縣黃廷圭改曰壽山自是不祭皆

無恙眾惑始祛

龍巖州志

惟志錄海峽海峽誌

蘇對代人地賦錄我我主知曰舊山自景不終首

蘇州城四十里齊山曰奉山緹宮故至開祭之始

或西表今文蘇蘇賦唱古之依蘇蘇必

資謀主求一十分好此限蘇蘇山冷密齊及

蘇蘇令蘇本衣書如蘇斐一人曰吾蘇蘇山之

南開天末外海蘇蘇如蘇東置靈石寶宇臨開云

蘇蘇蘇一云蘇蘇蘇蘇蘇蘇蘇蘇蘇蘇蘇蘇蘇蘇

福建續志卷九十二終



